

四庫全書

史部

欽定四庫全書

平定準噶爾方略正編卷七十三

乾隆二十四年五月甲辰

定邊右副將軍富德等疏奏撫定和聞情形

富德等奏言臣等於四月十六日兵至和聞之  
哈塔里副都統瑚爾起等遣侍衛達三保納爾  
布公品級伯克鄂對之姪阿卜達里木庫車伯  
克阿賚呼里額里齊伯克固爾班和卓密喇卜

屬人伊斯邁勒玉隴哈什伯克默努斯哈濟屬  
人圖柳默什哈喇哈什伯克默默什密喇卜屬  
人喇默特塔拉和卓來迎據稱克復和闐後從  
賊中脫出回人等有傳聞賊衆復來者今並未  
見一人現於各要隘設卡倫防守埋伏等語并  
呈送葡萄為贄臣等加以撫慰詢問各城生計  
及耕種事宜據伊斯邁勒等告稱各城雖為賊  
久困但各處尚有埋藏米穀自大兵到時即傳

令耕種額里齊哈喇哈什玉隴哈什本年雖未  
及種麥尚可種秋糧克勒底雅塔克齊爾拉此  
三城已經種麥等語臣等此次進兵口糧似可  
接濟其一應馳遞事件自阿克蘇之扎木至和  
闐前奏安設臺站五處今沿途察看戈壁甚多  
酌展為六臺派健銳營前鋒達蘭泰等六人以  
委署筆帖式管理所有兵丁口糧各於阿克蘇  
和闐就近支領俟會兵葉爾羌後或留或撤另

奏辦理奏入

上諭軍機大臣曰富德等兵近和聞詢據回人等傳聞賊衆復來迄今未見現已耕種安生等語逆賊等計窮力蹙豈肯復來不過據守葉爾羌大兵一至或且驚惶逃遁將來惟堵截最要兆惠富德合兵進剿斷不至如庫車城之難克必奮勇攻擊嚴密防範務使渠魁就縛於今歲成功方為妥協其悉心計議具奏

乙巳

命總督管甘肅巡撫吳達善回蘭州辦事

上諭軍機大臣曰楊應琚將至肅州哈密糧餉軍務辦理亦已就緒吳達善不必同駐肅州即回至蘭州將甘省一切地方事務同藩臬等悉心查辦有應行知會楊應琚者彼此咨商亦屬近便

丙午

諭定邊左副將軍成衮扎布等查拏逸賊

上諭軍機大臣曰據扎隆阿奏稱策布登扎布等於五月十六日自布延圖起程伊將卡倫外多木達都沙扎海等處安設臺站等事嚴飭該管辦理於十九日遵旨回烏里雅蘇台等語前派扎隆阿隨策布登扎布進兵續據成衮扎布奏留辦事著傳諭成衮扎布仍派扎隆阿或莽古賚領兵巡查臺站搜捕嗎哈沁并傳諭策布登扎布近據定長奏主事富奎報稱瑪納斯山有藏匿之綽羅斯台吉

烏勒木濟著一體查辦以靖地方

戊申

諭定邊將軍兆惠等酌量辦送羊隻

上諭軍機大臣曰據吳達善等奏稱阿拉善等處購  
買羊隻共十四萬有奇前後送往巴里坤由額林  
哈畢爾噶轉送軍營等語此項羊隻係軍營口糧  
此時始陸續出口至巴里坤自巴里坤至額林哈  
畢爾噶即屆秋末天寒雪盛解送維艱若急行趲



送則沿途傷損疲瘦究屬有名無實昨據富德奏稱伊等自和闐進兵彼處可得口糧卽兆惠進兵正值收穫之期又有糧運接濟朕意將此項羊隻先送者卽於阿克蘇交收後至者或於烏魯木齊等處收放俟官兵凱旋時以供牲餼及留備將來之用甚有裨益因未悉軍前情形著吳達善五吉清馥定長德舒永貴舒赫德等咨商定議辦理一面具奏亦傳諭兆惠等知之

諭喀爾喀副將軍策布登扎布搜捕哈丹阿巴噶斯

餘賊

上諭軍機大臣曰從前圖倫楚等追勦哈丹阿巴噶斯餘賊致令脫逃後巴祿前往究未追及而西路之兵亦未聞相遇伊等或由塔爾巴噶台逃往俄羅斯亦未可定著傳諭策布登扎布加意搜查倘遇此等逸賊務行勦絕不可致令免脫

諭參贊大臣額敏和卓獎賞回人各事宜

上諭軍機大臣曰據額敏和卓奏稱回城大小伯克等辦理事務甚屬輸誠効力已酌量賞給緞布等物以示鼓勵但伊等以賞戴翎頂為榮較他物更甚等語回人等急公効力理應加恩獎賞但伊等小頭目若賞以孔雀翎未免過優著賚送五品六品七品帽頂各五個藍翎十枝可酌量賞給至額敏和卓本係舊人前因兆惠舒赫德兩處奏摺均未列名是以降旨詢問今據奏在阿克蘇辦事但

進兵尤為緊要伊係參贊大臣著仍在兆惠等軍營行走

諭總督管甘肅巡撫吳達善撥解軍需緞布事宜

上諭軍機大臣曰吳達善奏甘肅應辦軍需布疋現於甘涼二府採買尚堪敷用不過市價稍昂等語所見殊未妥協甘涼一帶承辦軍需且間有被災之處民食未免拮据朕疊次加恩尤深軫念布疋市價既昂若又官為購辦則民間愈加騰貴殊非

體恤災黎之意除已經解送外餘著停止採買現  
在部庫存貯布疋甚多著戶部查明酌撥數千疋  
派司官一員按站解往肅州交該督等轉運以贍  
軍儲以便民用又據永貴奏移咨吳達善等運送  
緞疋若該督等所貯緞疋足用則已其或不敷即  
將需用數目定價具奏亦由內部辦理

命布政使永寧以原銜前往哈密協辦糧餉事務

己酉

議安插達什達瓦屬人事宜

熱河副都統富黨阿等奏言臣等查移來熱河  
安插之達什達瓦屬人統計兩次遷移及前往  
軍營人等男婦大小共二千一百三十六口內  
丁壯七百三名臣等酌擬每丁壯七十名編一  
佐領每佐領下領催四名馬甲六十六名前蒙  
恩旨分為三旗每旗設散秩大臣總管各一員副管  
旗章京副總管各二員佐領各三員換給關防

圖記其俸餉年年按三季支放照所得職銜降  
一等減半支給其散秩大臣總管鑲黃旗大臣  
布林管正黃旗鄂齊爾管正白旗托禮曾賞給  
三品全俸今既給與甲米請亦減半支給至伊  
等居住房屋散秩大臣總管各七間副管旗章  
京等五間佐領等四間驍騎校等三間兵丁二  
間共需房一千三百十二間現在蒙

恩添造俟工竣分派其鰥寡孤獨人等各附親屬養

贍又喇嘛十七名照例歸入普寧寺按月各支銀一兩米二斗奏入得

旨軍機大臣議奏尋議達什達瓦屬人自鄂爾昆移來熱河臣等曾經奏請令富黨阿海保酌量定議今據將現在軍營并前年移來人等通查分設佐領補放總督以下各官各按職銜支給俸餉換給關防圖記派住房間收養窮苦人等支給喇嘛銀米均係酌照舊例應如該副都統等



所奏辦理奏入得

旨布林鄂齊爾俱久經歸順之人著加恩仍給與全

俸餘依議

六月辛亥

授厄魯特車林丹巴等為藍翎侍衛

上諭軍機大臣曰厄魯特車林丹巴克特沁哈勒噶

什等曾經効力軍營著加恩俱授為藍翎侍衛

總督管甘肅巡撫吳達善疏奏預籌馬匹草束

事宜

吳達善奏言大兵進勦需用馬匹陝甘各營節次報解通計三萬一千二百匹有奇至凱旋時亦應預備馬匹請飭令各營另行朋餵健馬五千匹以供調取其各營摘缺亦俱分差官弁前赴松潘青海歸化城張家口等處採買補額惟是餵馬必需草束今准理藩院咨行將西林郭勒哲里木等處所交馬一萬一千八百六十餘

匹西三盟辦駝一千隻俱解交寧夏地方官收  
餵以備軍營咨取又西安省城各營解馬二千  
一百匹及陝甘二省朋餵馬五千匹青海鄂爾  
多斯阿拉善等處交駝六百六十餘隻通計馬  
駝一萬九千一百餘臣與軍需局司道商酌自  
口外抵巴里坤計二十二站每站應貯備十觔  
重草三萬束共草六十六萬束加以臺站及差  
遣往來馬匹共草九十餘萬束通計一百六十

萬東乘此夏月草茂派令赤金靖逆柳溝安西  
哈密巴里坤經管各員催夫收割所需價值於  
各該處軍需銀內支用奏入報

聞

癸丑

定邊右副將軍富德等疏奏安撫和闐及進兵  
道路情形

富德等奏言臣等於四月二十二日抵和闐之

額里齊城六城阿琿伯克回衆數千人攜壺漿  
跪迎歡忭之餘繼以涕泣備陳受賊擾害今始  
得安生業臣等加以撫慰令其各歸城守於安  
營駐劄後將瑚爾起等所獲賊人布庫塔斯諾  
們伯克等提出詳加審訊與原詞無異仍暫行  
看守其各城頭目等有被迫從賊者自應查明  
辦理但念地方新附且正當衆心驚疑之時似  
可不必深求以安反側至臣等此次進勸全恃

馬力因向霍集斯等商議據繪圖呈稱額里齊  
哈喇哈什水草尚好他城所不及至由額里齊  
至葉爾羌之呼爾璊地多戈壁取水不易又不  
雅勒瑪等四五站至固璊地方雖有水草而塞  
爾勒克楚魯克等處以及舊日固守之通古斯  
魯克等五六站亦多戈壁且值天暑馬匹必乏  
又與痕都斯坦要路相遠應請從丕雅勒瑪至  
固璊迤南山路行走尚有水草雖稍遠四五日

而休息馬匹以裕攻戰之用似有裨益奏入

上諭軍機大臣曰據富德等奏稱大兵已至和闐安撫回人并詢問霍集斯等進勦道路及堵截逆賊要隘等語覽霍集斯所繪圖內英額奇盤山在葉爾羌之西霍集占移其牲隻及烏沙克人等結營於此特以我兵若抵葉爾羌則此處賊人哭出夾攻互為犄角之意無足深慮但逆賊若不於城中藏匿而固守此地攜其妻子潛度伯克呼爾璘嶺

前無堵截之兵自後追擒殊為費力即如從前博爾奔察明瑞攻克勒特賊人據險防守而游牧久已逃去此即無兵堵截之驗也朕意伊等進兵十日前或二十日以前富德隊內派精兵四五百名以伯克鄂對帶領似額爾登額之侍衛等派出一二員先於伯克呼爾瑞嶺堵截賊若由此逃遁自可成擒未知和聞通伯克呼爾瑞嶺路全無阻隔否可傳諭兆惠富德等查詢辦理我兵若已取葉



爾羌霍集占尚在遁逃著富德明瑞領兵追襲兆惠即在葉爾羌駐劄辦理不可爭執前往

命賞原任同知通祿主事銜留巴里坤隨清馥等辦事

乙卯

諭定邊將軍兆惠等酌議進剿情形

上諭軍機大臣曰據兆惠等奏稱遣往布魯特之侍衛成果布占泰等帶領布魯特之明伊勒哈及喀

什噶爾之舊阿奇木伯克和什克伯克等前來據稱霍集占兄弟與霍罕城之額爾德尼伯克交好將來或往相投喀什噶爾之西岐路有三大兵欲擒賊必先取喀什噶爾據此三岐要隘自無所逃因傳檄額爾德尼伯克曉以利害其先取喀什噶爾再於葉爾羌會兵之處公同詳議續奏等語進勦逆賊堵截逃路甚屬籌畫但舍葉爾羌而攻喀什噶爾未必計出萬全若分兵以致力弱更覺難

收實效看來自烏什往喀什噶爾尚屬直捷兆惠  
富德等皆熟悉道路自應詳悉查詢昨覽富德所  
進地圖葉爾羌之西有自英額奇盤山過伯克呼  
爾瑞嶺通拔達克山之路朕即諭以駐兵堵截為  
要今兆惠奏內未曾敘及此地亦須留心商榷總  
之進兵形勢固須詢問回人要貴中有定見若向  
伊等責成取必不但見識短淺且慮其心生疑懼  
轉多支詞飾說可傳諭兆惠富德等此次進兵其

應先攻何地及於何處堵截即會同酌議具奏地方遙遠不必候朕指示一面應機辦理

定邊將軍兆惠等疏奏厄魯特達什勞績

兆惠等奏言去歲在葉爾羌効力官兵及厄魯特等俱蒙

恩賞卹臣等續查得厄魯特得木齊達什隨愛隆阿自葉爾羌歸途遇賊被創墜馬猶能奮搏抽刀刺殺一賊值救得脫又呼爾璫之戰達什胷肋

俱得鎗傷自從軍以來俱在前隊哨探行走奏  
入得

旨達什著授為三等侍衛賜固勇巴圖魯號賞銀一  
百兩

戊午

諭護軍統領努三等辦理哈薩克貿易事宜

上諭軍機大臣曰據努三永德等奏稱今年哈薩克  
阿布賚若遣人貿易自應遵照成規辦理但阿布

齊等前遣入覲之俄羅斯蘇爾統有無陳奏情詞  
恭請訓示以備將來應答等語哈薩克人性多鄙  
瑣惟利是圖除照常貿易外似無他說或懇賞塔  
爾巴噶台以廣游牧亦未可定若以此為言努三  
等即答云我等所辦者貿易事務其他則不敢干  
與且此地若果應賞給則俄羅斯蘇爾統入覲時  
應早經陳奏想來必不可行我等又何敢代奏似  
此明白曉示彼自無詞此旨可發交定長送往烏

魯木齊傳諭努三等知之

庚申

申諭定邊將軍兆惠等分兵進剿情形

上諭軍機大臣曰兆惠等以進剿情形覆詢和什克伯克等定議兆惠領兵先取喀什噶爾富德領兵攻取葉爾羌巴祿領兵由巴爾楚克路與富德會合互相策應其喀什噶爾西去之鄂坡勒嶺可通霍罕敏珠爾嶺玉斯屯阿喇圖什嶺俱通安集延

沿途之額德格訥伊什克里克等部落皆傳檄曉  
以利害並將地方形勢繪圖具奏昨覽富德所奏  
地圖有由英額奇盤山通拔達克山之路是以諭  
令派兵堵截今兆惠等悉心籌畫自合機宜著照  
所奏分路進兵聲息相通務期獲醜朕意我兵既  
入霍集占等若仍分守兩城即各行奮力攻取一  
城先下即合兵協力如霍集占走投喀什噶爾則  
前後攻擊自必成擒或波羅泥都知要隘已塞棄



城逃來葉爾羌必兄弟會合往投痕都斯坦拔達  
克山哈喇圖伯特覽伊等所奏地圖富德圖內則  
有英額奇盤山伯克呼爾璘嶺通拔達克山兆惠  
圖內則有通拔達克山之玉魯克嶺通巴勒提之  
裕勒阿里克及通哈喇土伯特之薩納珠等路駐  
兵堵截甚屬緊要今將兩圖重繪於應行駐兵之  
地貼簽指出寄伊等閱看辦理

諭定邊右副將軍富德等查辦和闐事宜

上諭軍機大臣曰富德奏擒獲之回人布庫塔斯懇  
請發往葉爾羌招撫鄂斯瑞及喀喇沁之厄魯特  
等又將効力之阿什默特暫管和闐六城事務其  
各城辦事伯克等給與翎頂以肅觀瞻等語布庫  
塔斯尚非要犯姑從寬釋令其招撫回人自屬可  
行至各城効力回人既經分別獎賞翎頂著加恩  
仍賞緞各一端其家屬被害之額里齊伯克阿什  
默特哈喇哈什伯克默默舍協辦額里齊事務之

固爾班和卓玉隴哈什伯克摩羅穆努斯克勒底  
雅伯克阿里瑪沙哈喇哈什之阿里木沙與告知  
大兵來信以堅衆志之阿里雅爾俱著加賞緞一  
端至陣亡及被賊戕害之回人等將逃叛家產查  
出賞卹得傷回人等各賞銀十兩俱照所請行其  
守城回人千餘亦屬効力俱著酌賞銀兩再効力  
之索倫領催署章京布特木濟等既戴獎賞翎著  
加恩將戴孔雀翎者授為三等侍衛戴藍翎者授

為藍翎侍衛又

諭曰藍翎侍衛哲勒順自阿克蘇遣往和闐招撫克勒底雅人等正值鄂斯璘攻城之際為賊所害據富德查奏伊原係寧古塔馬甲其父扎勒虎原任吉林鑲白旗驍騎校弟哲森保現任正白旗佐領等語著傳諭吉林將軍薩喇善等將哲勒順有無子嗣查奏若有子即加恩給與世職無子則酌量賞給伊父銀兩以示優卹

辛酉

授貝勒品級霍集斯等為阿奇木伯克等職

上諭軍機大臣曰副將軍富德奏請補授和闐等城伯克霍集斯鄂對皆甚屬効力和闐係霍集斯舊屬著授為管和闐六城之阿奇木伯克鄂對前已授為阿克蘇之阿奇木伯克著仍其舊任額里齊伯克阿什默特授為散秩大臣其各城伯克照阿克蘇烏什例賞三品帽頂孔雀翎協辦事務之伯

克賞四品帽頂孔雀翎霍集斯現在軍營其和闐六城事務即交阿什默特署理又

諭曰據富德奏稱霍集斯鄂對因舊事頗不相合今已和解伊等又請將阿什默特授為管和闐六城伯克等語霍集斯人不可信未便留於故地已密諭兆惠等今富德如此辦理特以安慰衆心以理勢揆之霍集占等尚未就擒其補授總理諸城伯克之處即不遽辦亦可但富德等業經具奏未便

停止富德進兵時著與霍集斯鄂對同往兆惠等  
功成奏凱將霍集斯鄂對和什克伯克皆同來陞  
見霍集斯若安心來京俟至日再行酌定若稍有  
推托延緩情形兆惠等亦當相機辦理此時加意  
慎密為要

諭陝甘總督楊應琚等緩運補缺糧石

上諭軍機大臣曰楊應琚奏籌補哈密糧石一摺現  
在軍營需用糧石陸續轉運約計已足兼有牛羊

可資口食緞布可供易換且和闐等處多經耕種  
軍行所至因糧之處當復不少且諭令撙節支用  
斷不至於缺乏無庸汲汲籌畫著傳諭該督等自  
哈密起運之糧聽其運赴開展至內地補缺糧石  
竟可緩緩籌辦甘省現值歉收軍儲與民食正當  
並重惟應多留餘糧以給平糶賑濟之用雖所撥  
不過一二萬石然亦恐多拮据不可不熟籌也併  
傳諭兆惠等知之



授藍翎侍衛烏爾圖保為三等侍衛

上諭軍機大臣曰據富德奏稱獎賞藍翎烏爾圖保  
守額里齊城晝夜拒賊鼓勵回人等語烏爾圖保  
奮勉可嘉著加恩授為三等侍衛

丁卯

諭喀爾喀副將軍策布登扎布協勦霍集占等事宜  
上諭軍機大臣曰據策布登扎布等奏稱伊等領兵  
千名於六月初三日至察罕郭勒計閏六月初間

可至塔爾巴噶台若緩行五十餘日亦可至特穆爾圖淖爾等語是伊等於七月二十左右可抵特穆爾圖淖爾正當兆惠等進兵勦賊之際與其閒駐於塔爾巴噶台何如協力擒賊以壯軍威可傳諭策布登扎布等務宜酌量馬力不致疲乏且與兆惠聲息相通若有需用即候其行文或奮力協勦或加意堵截并傳諭兆惠等酌量調遣

己巳

諭喀爾喀副將軍策布登扎布等搜捕逸賊

上諭軍機大臣曰定長等奏據舒景阿報稱烏魯木齊所牧馬騾於夜間被賊驅入博克達山隨派官兵尋踪追至木壘之源賊棄其什物直向薩爾海逃去等語從前主事富奎擒獲嗎哈沁供內有綽羅斯台吉烏勒木濟帶三十七户在瑪納斯山藏匿經定長等奏至朕即調策布登扎布沿途留心搜捕此次竊馬賊人或即藏匿瑪納斯山者亦未

可定且我兵平定伊犁時厄魯特等多有投入哈薩克者今值我兵撤回伊等乘虛盜取哈薩克馬匹復回故地藏於幽僻正自不少可傳諭策布登扎布等自塔爾巴噶台往特穆爾圖綽爾將瑪納斯山藏匿薩爾海敗逃及哈薩克轉回之嗎哈沁等必須嚴行搜捕隨遇勦殺不可疏脫又

諭曰定長等奏舒景阿聞馬騾被竊即同遊擊金梁往追定長等亦派官兵協拏又令主事富奎前往

等語舒景阿管轄屯田兵丁不能搜勦嗎哈沁致  
令馬匹牲畜被竊則現在送往軍營之牛羊皆由  
額林喀畢爾噶行走若致盜竊驚失所關匪細努  
三永德現往烏魯木齊辦哈薩克貿易事務著交  
與伊等查拏此等嗎哈沁仍傳諭舒景阿馬匹牲  
隻被竊伊即有應得之罪乃並不具奏但呈報定  
長等竟若職不當奏事者然顯係推卸著明白回  
奏今哈薩克貿易尚需時日努三等皆身經戰陣

之人烏魯木齊兵力即不能盡勦逸賊而護送軍需牛羊不致疎失方為無忝職守其加意勉之

命賞藍翎侍衛那木查爾等巴圖魯號

上諭軍機大臣曰昨諭富德將應援兆惠時伊隊內之應賞巴圖魯號者查奏四五人今思所奏之藍翎侍衛那木查爾十人俱奮勇勦賊負傷効力且人數亦不甚多那木查爾著加恩賜號丹巴巴圖魯西爾庫爾賜號舒都喇呼巴圖魯伊登古賜號

固濟爾巴圖魯侍衛上行走之護軍校額爾塞賜  
號特古斯巴圖魯領催署防禦科丕塔賜號伊德  
爾巴圖魯獎賞藍翎領催晉寶賜號尼斯庫巴圖  
魯阿達罕賜號庫爾察巴圖魯領催恩特賜號卓  
克托巴圖魯前鋒巴爾塔賜號布圖庫巴圖魯登  
擢賜號圖魯巴圖魯仍照例各賞銀一百兩額爾  
塞因差來京已授為三等侍衛著加賞銀三十兩  
馳驛前赴軍營

庚午

議撤青海防兵事宜

陝甘總督楊應琚奏言西寧青海之得卜特爾  
伊克柴達木等處安設卡倫原以防範準夷今  
伊犁已入版圖口外各處駐兵從前所設卡倫  
人跡不到應請自本年八月防兵回汛之時即  
行停止其青海蒙古仍各於駐牧邊界防守奏  
入得



旨軍機大臣議奏尋議前督臣黃廷桂以伊犁平定  
請將巴顏布拉克派駐官兵撤回西安本營今  
所有噶斯口至青海安設卡倫派蒙古及西寧  
鎮官兵防守事屬空設應請一例裁撤其蒙古  
官兵二百四員名即於各邊界防守聽總理青  
海事務大臣查察西寧鎮標官兵一百四員名  
莊浪滿營官兵二十四員名均行撤回本營差  
操以節浮費而收實效奏入

上從之

壬申

授薩喇爾為散秩大臣

上諭軍機大臣曰薩喇爾在軍前僉事曾經拏問治罪究屬糊塗蒙古怯懦貽誤念其前從準噶爾率屬來投頗能抒誠効力著加恩授為散秩大臣在乾清門行走仍補授鑲白旗蒙古副都統

癸酉

諭定邊將軍兆惠等偵探賊人信息

上諭軍機大臣曰富德等奏稱和闐與葉爾羌之間並無城郭不過零星村堡霍集占已將葉爾羌附近居人收入城內今續到馬匹若能趲赴更善或不能即就現在馬匹千餘整頓起程緩行以待且葉爾羌通痕都斯坦哈喇土伯特之薩納珠奇里洋裕勒阿里克等要隘距和闐甚遠亦必由此經過方得水草且可分道偵探賊人或守城或逃走

信息賊若向痕都斯坦等路逃走正與我兵相遇  
更易成擒擬於六月初酌辦口糧起程沿途相機  
勦撫等語所辦尚合機宜昨兆惠等奏詢問和什  
克伯克所言喀什噶爾以西三路須先為據守防  
賊竄逸又續奏伊領兵攻喀什噶爾富德攻葉爾  
羌等語俱經諭令互相商酌并於地圖貼簽指示  
此時應已奉到其悉心籌畫以奏膚功又富德奏  
稱伊與伯克霍集斯同行其伯克鄂對已遣往阿

克蘇等語并傳諭兆惠等鄂對効力軍前已將二載自當稍為休息聞伊行裝為賊所掠甚可軫念著賞銀二百兩令其在阿克蘇辦事伊若情願出兵求請誠切兆惠即同伊前往亦可仍著加意體恤

恩免侍衛烏三泰等應扣整裝銀兩

上諭軍機大臣曰富德等奏稱侍衛烏三泰員外郎留保住曾借給二年俸銀整裝前抵軍營應於京

俸內坐扣還項可否照瑚什等之例免其坐扣等語烏三泰等皆派往軍營所借整裝銀兩即照瑚什之例賞給再侍衛敦察與留保住同行富德等未經奏及豈以伊在兆惠軍營故耶殊屬拘泥敦察著加恩亦照烏三泰等例一體賞給不必坐扣

甲戌

諭定邊將軍兆惠等曉示投入回部之厄魯特

上諭軍機大臣曰從前兆惠等曾奏稱投往回部之

沙喇斯瑪呼斯等厄魯特皆惑於霍集占之言謂  
歸降亦不免死因助逆賊為惡等語此次進兵非  
平定伊犁可比特欲擒獲霍集占等以輯寧回部  
至厄魯特等尚應招撫寬宥革其從逆之心而分  
賊黨之力伊等兩路軍營俱有効力之厄魯特等  
應令明白曉示從前所勦厄魯特等皆負恩反覆  
之徒若誠心歸附即未嘗妄殺其盡戮伊等之言  
係訛傳捏造且隨營立功加恩授職者甚多此次

進兵不但歸誠之回人加恩安養即沙喇斯瑪呼  
斯等厄魯特果能悔罪來降亦一體撫恤兆惠等  
即徧行傳諭相機辦理

恩賞病故遊擊伍凌阿恩騎尉准襲一次

上諭軍機大臣曰富德奏遊擊伍凌阿在軍前病故  
伍凌阿前以遺失礮位部議革職續因守禦和闐  
頗屬効力准其開復今聞病故殊可憫惻著加恩  
賞給恩騎尉准襲一次仍賞銀五十兩



乙亥

諭陝甘總督楊應琚等移調駐防大員事宜

上諭軍機大臣曰據楊應琚等奏請將巴里坤糧務道移駐哈密督辦一切事務其巴里坤酌留同知一員佐雜二員辦理支放月餉等事尚有知府一員同知一員佐雜二員應請裁歸本任等語已諭軍機大臣議奏細想楊應琚所奏不過就現在情形酌量移駐原可暫准施行若論經久之道則已

里坤究為邊陲要地正須加意籌度今年因軍臺改設山南凡供應差使轉運軍需皆取給於哈密自不得不專派大員經理若軍務告竣屯田伊犁則又當以巴里坤為總匯之地非今日情形可比即如安西向為重鎮今準噶爾全部蕩平伊犁皆為內屬則安西又無須文武大員駐防彈壓看來以安西道員移駐哈密以安西提督移駐巴里坤於節制控馭之道方為妥協著傳諭楊應琚等悉

心籌畫於應行改駐之時即行奏請定議至請將  
安西道文綬調回本任文綬既在哈密本任事務  
原可就近辦理亦不必即回

陝甘總督楊應琚疏奏籌補摘缺馬匹

楊應琚奏言陝甘各營馬匹最為充足軍興以  
來時有調取而旋撥旋補未能足額臣抵任後  
通行查核除調往軍營之綠旗兵俟凱旋查核  
其滿漢各營共應補馬三萬八千餘匹經前督

臣黃廷桂奏請先行買補三分之二迄今尚未足數現在奉撥直隸馬二千二百餘匹補給西安滿營其餘各營又奉撥鄂爾多斯青海等馬三千餘匹近又撥解西林郭勒等盟預備馬一萬一千有奇以補三分之二有餘而全數則不足若令一時購買足數固屬不易然積少可以成多分辦庶能集事應請飭查各營未經購買及撥補未足者俱令照每匹加增十兩之例赴

司請領陸續買補足額庶營伍充足并可備調  
撥之用奏入報

聞

丙子

命革副都統舒景阿職効力贖罪

上諭軍機大臣曰副都統舒景阿在烏魯木齊辦事  
有嗎哈沁驚散牧羣即當一面奏聞一面領兵追  
捕乃伊但報知定長轉奏而自從博克達山至積

木薩尋踪十餘日迷路而返不過苟且塞責殊屬  
可惡舒景阿著革去副都統仍留本處効力贖罪  
豐訥亨此次應援進勦甚屬効力著即補授副都  
統

平定準噶爾方略正編卷七十三

欽定四庫全書

平定準噶爾方略正編卷七十四

乾隆二十四年六月丁丑

諭定邊將軍兆惠等不必搜查回人性隻

上諭軍機大臣曰昨兆惠等因和闐遣來阿克蘇之  
回人默們訥則爾等傳說克勒底雅有牛羊數千  
及賊人所留羊千餘隻未知虛實行文富德就近  
詢問今據查奏伯克鄂對侍衛齊凌扎卜及克勒



底雅之阿琿伯克等俱稱除現在交官外餘多被賊搶掠亦間有藏匿等語覽所譯回人呈文頗覺疑懼伊等甫經歸順即被圍三月之久雖有藏匿情事亦當佯為不知以安衆心若復逐一搜查徒滋紛擾已於富德奏摺以尚覺搜求太過批諭總之成大事者不可煩苛瑣細可傳諭兆惠富德等稽查此項牲隻即著停止至默們訥則爾不過新來歸附之小人所言未可全信不必將回人情事

向伊究問

諭定邊將軍兆惠等豫籌樽節糧餉

上諭軍機大臣曰據五吉奏稱奉到續送羊隻過期  
即存留牧放之旨計前後共送羊五萬隻至阿克  
蘇其八月內外送到者或在哈密或在巴里坤牧  
放等語從前因後到羊隻若仍送軍營則中途風  
雪必多倒斃疲瘦有名無實是以諭五吉清馥定  
長等議奏今清馥五吉俱已奏覆又楊應琚請撥

哈密存貯米二萬石運往闢展再於肅州運米補額朕諭以各處屯田既有收穫又回人等交納糧石及收取賊人所種諒已足食甘省歲歉應暫停撥補可傳諭兆惠等俾知前後辦理情形加意撙節糧餉並收取賊人積蓄以資軍食惟宜默為籌畫不可使兵丁知而傳說致有漏洩

諭陝甘總督楊應琚等豫籌屯田事宜

上諭軍機大臣曰努三奏稱查勘自木壘至烏魯木

齊若盡開屯田則所用兵丁太多而間隔遙遠亦煩運費惟特訥格爾昌吉羅克倫距烏魯木齊頗近地畝亦廣將來回部全定伊犁駐防應以必需防兵若干與屯兵糧餉合算量籽種以定兵數就收穫以給軍食既可省內地輓運之煩亦不患多兵冗食等語昨楊應琚來京奏對曾請前往伊犁及屯田等處查勘而伊犁駐防議定兆惠富德回京舒赫德駐劄辦事亦已降諭旨計楊應琚起程

前往必與兆惠等凱旋相遇而舒赫德又承辦此事楊應琚宜與兆惠等酌定伊犁應駐兵幾千名其努三所奏烏魯木齊等處屯田事務作何辦理及不悞春耕與舒赫德等悉心會商具奏一面即行辦理著將努三奏摺錄寄楊應琚閱看併傳諭兆惠等知之

戊寅

諭定邊將軍兆惠等辦理布魯特來降回人事宜

上諭軍機大臣曰兆惠等奏在布魯特居住之回人  
鄂托蘭珠和卓瑪木特與布魯特之瑪木特呼里  
納喇巴圖等所遣屬人同來投見據稱伊等皆霍  
集占等一族從前大兵平定伊犁原欲歸附因逆  
賊復叛遂潛匿於布魯特游牧去年聞大兵抵葉  
爾羌伊叔額爾克和卓額色尹伊弟圖爾都和卓  
曾領兵搶掠喀什噶爾之四處村堡今仍在布魯  
特納喇巴圖處候進兵信息情願効力等語可傳

諭兆惠等鄂托蘭珠和卓瑪木特與在彼之額爾克和卓額色尹等及瑪木特呼里屬人應否頒給勅諭或止應賞給緞疋著查明具奏其布魯特若有似瑪木特呼里効力之人及額爾德尼伯克若有歸誠信息或降旨慰諭著一併查奏但布魯特回人等既係逆賊一族又曾在伊犁居住此次投見或乘我平定回城後窺伺倣倖亦未可深信我兵蕩平回部不可仍令藏匿即酌量送京安插亦

宜豫籌辦理

閏六月己卯朔

諭定邊右副將軍富德等相機進剿

上諭軍機大臣曰據富德等奏稱有回人哈里瑪自  
葉爾羌逃出將所詢供詞知會將軍兆惠定於六  
月初二日自和闐起程沿途息養馬力俟得兆惠  
進兵信息相機辦理又和闐六城伯克等願派兵  
六百五十名從軍効力甚屬誠懇請將各城為首



伯克等留辦事務其小伯克等酌量派出令伯克  
霍集斯統領進發等語觀回人所告情詞是逆賊  
霍集占已無計可施大兵一至成功應速富德即  
行前進深合機宜朕佇聞捷奏其和闐從軍回人  
著加恩每名賞銀二兩領兵之大伯克賞緞二端  
小伯克賞緞一端仍將恩旨傳諭至駐劄和闐之  
遊擊丑達與協同辦事之察哈爾委署章京固穆  
扎卜俱著賞戴孔雀翎吉林署驍騎校黑住亦賞

戴藍翎

諭欽天監監正明安圖等詳繪回部地圖

上諭軍機大臣曰昨兆惠富德等將葉爾羌喀什噶爾等處地圖繪畫呈覽著發給明安圖德保至回部時按圖閱看再將該處地形高下日月出入度數測量則易於定稿又所至之地其山河城邑村堡若與此圖有不相符合者即閱看更正

癸未

陝甘總督楊應琚疏奏辦解軍需羊隻

楊應琚奏言欽奉

諭旨將解送軍需羊隻十四萬有奇計其可抵軍營者先送阿克蘇續送羊隻酌量牧放備用臣會同撫臣吳達善查得先從內地辦解羊五萬隻應請送至阿克蘇以備軍營口糧其續送之鄂爾多斯羊五萬餘隻及阿拉善羊五千隻俱接次前來驗其肥瘦分別留牧趲送應以到巴里

坤之月日為斷截至閏六月止俱解送阿克蘇  
其七月以後即就近留於哈密牧放又烏蘭察  
卜羊三萬隻據署寧夏道知府王應瑜節次稟  
報併採買牛一千五百隻於六月十二日全數  
驗收其牛隻欽奉

恩旨每隻作價五兩賞借寧夏寧朔平羅三屬農民  
無不歡感至羊隻因長途多致疲瘦請於寧夏  
先行牧放俟解至肅州再行送往哈密奏入報

聞

總督管甘肅巡撫吳達善疏奏收割驛站馬匹  
草束

吳達善奏言欽奉

諭旨於衝途驛站馬匹暫停折支乾銀日給本色料  
草以資飼秣臣自肅州回抵蘭州沿途查驗馬  
匹每多疲瘦詢知料草不敷支給邇因旱歉草  
價昂貴每束十斤需銀七八分且有加倍者臣

思口外馬匹不必盡食穀草而雜項草束為價  
頗輕若僱夫收割自必更省酌以每束四分為  
率不獨有益軍需且無業貧民兼資餬口於錢  
糧亦有節省奏入得

旨此亦通融調劑之法可權時行之

丙戌

諭定邊將軍兆惠等查詢進剿情形及馬駝分數

上諭軍機大臣曰據兆惠等奏稱准富德等咨送葉

爾羌逃出回人哈里瑪供詞復詢問霍什克伯克  
仍照前定議先攻喀什噶爾侯富德信息堵截賊  
人逃竄之路等語昨據富德奏報朕諭以賊勢不  
過如此我兵即可成功今兆惠等亦定於六月十  
一日起程深合機宜佇聞捷奏但兆惠聞富德所  
送回人供詞又質之霍什克伯克似專向伊等責  
成詢問恐新附之人未免驚疑不以實告嗣後當  
於無意中慰諭咨訪庶少支詞勦說又所奏內地

馬匹於六月初八日全到駝隻亦陸續前來等語  
計此時應先送馬數千匹於富德軍營矣至所送  
馬駝或傷損尚少是以未經聲說但數目臆分若  
何亦應奏及併著傳諭知之

戊子

諭定邊左副將軍成袞扎布搜捕嗎哈沁

上諭軍機大臣曰據成袞扎布奏稱薩拉布拉克卡  
倫馬匹被賊盜取此等賊人或在拜塔克等處藏



匿叅贊大臣扎隆阿已領兵前往搜捕仍應派員  
協助請令臣子額爾克沙喇率侍衛一二員前往  
策應等語扎隆阿未必經練事情熟習道路額爾  
克沙喇則朕所深知與其同行不如獨往庶無掣  
肘之虞可傳諭成衮扎布即著額爾克沙喇前赴  
扎隆阿軍營代領其兵搜捕嗎哈沁若兵力尚弱  
即於喀爾喀兵內酌量挑選將從前盜取烏魯木  
齊牧放馬匹此次盜馬賊人及沿途藏匿嗎哈沁

務期擒獲勦除事竣後在博克達山等處堵截逃竄賊衆若糧餉不繼彼處與定長所駐頗近即行文支給扎隆阿仍回烏里雅蘇台辦事現在辦理薩拉布拉克賊人情形併著奏聞

己丑

諭定邊將軍兆惠等酌調巴祿領兵事宜

上諭軍機大臣曰富德奏稱准兆惠咨令巴祿領兵渡葉爾羌河會合夾攻但巴祿之兵必由聽哨阿

卜呼爾瑞前進距葉爾羌甚近賊人見其勢弱必  
相抗拒且堅守河口即大兵亦不能徑渡於事無  
益請令巴祿由巴爾楚克前進於葉爾羌喀什噶  
爾之中據其要隘可以堵截賊人俾兩路聲息相  
通等語近因兆惠奏定議令兆惠先取喀什噶爾  
富德取葉爾羌巴祿策應富德今據富德奏巴祿  
不足為伊聲援無需進發所見甚是巴祿即相機  
據守要隘仍聽兆惠調遣若二城賊衆彼此潛通

信息即行堵截搜捕與兩路會合俱著傳諭知之  
諭定邊左副將軍成衮扎布酌議搜勦嗎哈沁

上諭軍機大臣曰昨諭成衮扎布專遣伊子額爾克  
沙喇搜捕盜馬賊人今據策布登扎布奏稱伊等  
過阿爾台沿途搜捕並無嗎哈沁等語是盜馬賊  
人原非大隊可知且額爾克沙喇此行已後策布  
登扎布兩月餘恐歸途天寒雪盛不便行走或暫  
時停止前往俟回部平定再將此等嗎哈沁徹底

搜捕亦可額爾克沙喇熟悉地方情形如必須一往即遵前旨起程或趲赴策布登扎布軍中若不  
能相及即可勿行著伊父子詳悉酌定辦理一面  
具奏至馬匹被竊既非大隊賊人則卡倫人等疎  
懈之咎難辭著嚴行申飭令其加意防範

命阿克蘇辦事侍郎永貴回京

上諭軍機大臣曰舒赫德奏奉到著回阿克蘇辦事  
之旨將交辦事件與富德議定於六月初十日起

程等語前以永貴久在軍營令其回京續因舒赫德領兵策應阿克蘇辦事乏人故命永貴前往今舒赫德已遵旨回阿克蘇接辦事務後永貴即著回京

諭陝甘總督楊應琚以糴穀情形曉示商民

上諭軍機大臣曰楊應琚奏請添撥司庫銀二十萬兩採買寧夏府屬麥豆米穀備用此舉若因甘省歉收籌備賑卹自屬應行如謂阿克蘇等處仍須

籌備軍糧則正可不必蓋大兵現在起程進剿可  
以計日成功又據永貴等奏軍營糧餉已由闢展  
輓運加以屯田收穫回人輸助自可源源接濟著  
傳諭該督所糴糧石應酌量賑務需用情形辦理  
並曉示商民俾知採買穀石原以供本地之用非  
為籌備軍糧起見庶庸愚無識之人不至張皇傳  
說永貴摺並著錄寄閱看

辛卯

諭定邊將軍兆惠等招撫波羅泥都各事宜

上諭軍機大臣曰富德奏稱伯克霍集斯請遣伊親  
信之伯克巴喇特以回字文書招撫波羅泥都並  
據稱此策有効當受恩榮但慮不能成事為懼等  
語伯克霍集斯既感激朕恩招降以離賊黨深可  
嘉悅著加恩賞給緞疋至伊翰誠設策果如所算  
自必加恩萬一波羅泥都執迷不悟罪有所歸與  
霍集斯何與若波羅泥都悔過歸誠即令其從征



葉爾羌事竣再來京入覲若但遣人乞降當以從  
前諭旨及此次招降皆因波羅泥都人頗誠實不  
似霍集占之狂悖如欲免罪安生非親身前來不  
可著傳諭兆惠富德等遵照辦理又

諭曰富德奏稱黑龍江署叅領巴岱在瑚爾起等隊  
內奮勉出衆等語巴岱著賜號額爾克巴圖魯賞  
銀一百兩又回人摩里斯拉木至和闐額里齊以  
大兵前來曉示賊衆致被戕害甚屬可憫雖經賞

伊家屬房產仍賞銀五十兩著富德傳諭回衆知之

諭定邊將軍兆惠等豫籌移駐回人各事宜

上諭軍機大臣曰據舒赫德等奏稱酌議平定回部後將各城回衆稍令休息於十分內派出一分遷往伊犁屯田餘人令其協助資糧其從前曾往伊犁者仍行派出等語雖有所見尚未深悉情形此等烏沙克回人與厄魯特雜居年久未免漸染惡

習反覆無定恐駐防兵丁數千人難於彈壓此次  
進兵尚應大加懲創其餘脅從之衆亦不便居其  
故地或移往吐魯番安插距內地既近而額敏和  
卓亦能約束朕此意是否可詢問額敏和卓令其  
議奏至各城回衆數年來甚覺窮困驟行遷徙勢  
必不能或一二年後再選老成謹慎之人前往伊  
犂安插至伊犁駐防糧餉於回人應交貢賦內酌  
量折收米石運往支給似亦可行雖非現在急務

自此次第辦理亦甚妥協併著兆惠等定議具奏

壬辰

申諭定邊將軍兆惠等招撫波羅泥都事宜

上諭軍機大臣曰兆惠奏稱現在進取喀什噶爾伯克霍集斯所遣招降波羅泥都之人若即行遣往轉使賊人知我聲息擬將伯克巴喇特帶領行走相機差遣等語霍集斯招降波羅泥都之議係遵朕諭旨昨富德具奏又已降旨獎賞若慮賊人知

我聲息則我兵自阿克蘇起程賊豈全不知覺且富德奏請差遣之人兆惠又復留待轉使霍集斯生疑至若臨時招撫波羅泥都必謂先期未見遣人此特懈我衆心必致徒增疑懼著傳諭兆惠等仍遵前旨將伯克巴喇特即行遣往

諭叅贊大臣舒赫德等調回西安兵丁

上諭軍機大臣曰據兆惠等奏稱派出西安兵五百名聽候臺站調遣餘兵一千五百名交駐劄大臣

於阿克蘇烏什等處分防等語兆惠正當需用兵  
丁之時轉將西安兵存留者蓋因伊等不習勞苦  
耳但即留駐阿克蘇亦恐無裨實用徒糜糧餉不  
若遣回本營可傳諭舒赫德將此項兵丁約計從  
阿克蘇至巴里坤程期給以口糧令其步行回巴  
里坤仍將伊等未習勞苦不能從征自後宜加奮  
勉務為有用之人明白曉示至巴里坤日著清馥  
照例辦給車輛遣回西安

諭巴里坤辦事內閣學士清馥等派兵搜捕嗎哈沁  
上諭軍機大臣曰定長等奏稱主事富奎等領兵七  
十名搜捕盜取烏魯木齊牧羣之嗎哈沁等至博  
克達山遇賊百餘殺賊四人奪馬六匹仍前往追  
剿等語所奏殊未明晰富奎所報百餘人或通計  
家口則我兵自可盡行俘獲但伊等帶領者係綠  
旗兵以致疎脫耳著傳諭清馥等巴里坤有存留  
索倫官兵即選派百餘名於內地現送馬匹內撥

給二百餘匹令其追及努三前往搜勦若現無存  
留索倫而努三處亦係屯田兵丁即停其追勦俟  
來年大兵凱旋時再行辦理俱著傳諭知之

命革驍騎校額爾登保職効力贖罪

上諭軍機大臣曰成衮扎布等奏稱薩拉布拉克卡  
倫驍騎校額爾登保往追盜馬賊人遇雨迷踪已  
飭令前赴扎隆阿軍前効力自贖等語額爾登保  
係卡倫侍衛馬匹被竊即有應得之罪及追捕賊



人又復中途轉回成衮扎布等不行奏請治罪未免姑息今既經復往著傳諭扎隆阿將額爾登保革退驍騎校自備資斧効力倘仍前疎懈定行從重治罪

命獎賞烏梁海內大臣察達克等官兵

上諭軍機大臣曰成衮扎布奏烏梁海內大臣察達克聞知歸併伊等管轄之庫庫勒濟等逃走即領兵前往追獲等語察達克著加恩賞緞四端其所

領官兵照近日車木楚克扎布出兵之例賞給

定邊將軍兆惠等疏奏進剿事宜

兆惠等奏言臣等前奏派馬步兵各五千名進  
取喀什噶爾其和闐一路已派兵五千仍酌派  
三四千名令巴祿帶領由巴爾楚克路與富德  
會合嗣於六月初八日內地送馬全到臣等領  
兵九千名又巴祿領兵三千三百名於十一日  
起程十九日准富德咨送奏稿以巴祿所領兵

少不能刻期會合宜令據守葉爾羌喀什噶爾兩城要隘聽臣兆惠調遣仍候臣等信息臣等查葉爾羌在南喀什噶爾在北相隔二百里如專攻葉爾羌則喀什噶爾據我之右且逃往霍罕拔達克山各路俱不能堵截又慮富德隊內兵少是以令巴祿協助今據咨仍令隨臣等行走亦不暇往來商議即率同往取喀什噶爾若霍集占自葉爾羌來援富德即可乘虛取城或

喀什噶爾先得可與富德并力攻取葉爾羌又  
據富德咨由和闐行走二十日可抵葉爾羌臣  
等亦約計六月二十一二日可抵喀什噶爾奏  
入報

聞

辦理屯田副都統定長等疏奏烏魯木齊增墾  
畝數

定長等奏言臣等查屯田舊墾共三萬三千五

百四十五畝今年增墾一萬零四百七十四畝  
因有閏月又督課官兵於烏魯木齊等處增墾  
八千七百七十二畝播種粟米計新舊地共種  
過五萬二千七百九十一畝奏入報

聞

乙未

陝甘總督楊應琚疏奏豫籌屯田事宜

楊應琚奏言臣欽奉

諭旨豫籌駐兵屯田事宜俟大兵捷音一奏臣即端  
行與將軍等會商駐兵事宜至辦理屯田必須先  
事籌畫方可無悞春耕查特訥格爾昌吉羅  
克倫等處地氣和暖且與烏魯木齊相近可徑  
行運送伊犁增兵屯田實為善策查烏魯木齊  
現有屯兵一千名臣擬於凱旋綠旗官兵內截  
留五千名以四千分墾地畝以一千豫備差遣  
明年收穫即可供伊犁糧餉俟伊犁屯田又可

接續其巴里坤有屯兵八百名應將安西提督  
移往駐劄其移駐及增兵事宜臣再行會商定  
議此時農具籽種最為緊要查前督臣黃廷桂  
曾於上年冬月辦過籽種二萬八千石運到闕  
展一萬一千餘石農具一萬三千副現貯哈密  
農具六千餘副今於肅州僱得商駝四百餘隻  
請將應送烏魯木齊等處農具籽種口糧按程  
給值源源轉運至耕田牲隻亦屬要需查甘省

各提鎮原有孳生兒騾馬匹擬於此內挑選一  
二千匹七八月間即令送往巴里坤牧放以備  
調撥奏入得

旨所見已得大要矣一切悉心為之

丁酉

調定邊將軍兆惠等豫籌駐兵事宜

上諭軍機大臣曰舒赫德奏稱庫車以內吐魯番以  
外庫爾勒玉古爾等處俱有舊城且距內地不遠



可以形勢連絡應擇要地築城駐兵照安西之例酌設提督總兵一員多派綠旗兵屯田以供糧餉既可約束各城回人而伊犁駐防亦不患單弱等語平定回部後築城駐兵自應豫為籌畫著傳諭兆惠富德等俟應行辦理時酌量定擬具奏朕意葉爾羌喀什噶爾全定霍集占兄弟俱獲仍著舒赫德於阿克蘇駐劄督辦一切事宜若逆賊等有逃遁者則仍應於葉爾羌駐兵堵截查拏始可彈

壓諸城俱著兆惠等就地方情形辦理務期永遠寧謐  
諭護軍統領努三合策應兵剿賊

上諭軍機大臣曰努三奏稱因烏魯木齊牧羣被竊  
領兵三十餘名前往博克達山一帶搜捕等語努  
三領兵甚少奮勉可嘉已諭清馥等將巴里坤存  
留索倫兵選派百餘名前往策應以壯軍威

諭辦理屯田副都統定長等查辦倒斃牲隻

上諭軍機大臣曰努三奏稱查核烏魯木齊屯田牲

隻倒斃分數過多頗屬明晰著傳諭定長等詳行查辦將交收牧放官員按其倒斃分數察勤惰以定功過併傳諭努三知之

命選派司員筆帖式等委辦阿克蘇等城事務

上諭軍機大臣曰舒赫德奏稱阿克蘇等城交收回入貢賦查核戶口數目需員承辦請揀發通曉蒙古語言文字練習事務之司官筆帖式等以備差委等語著於部院內揀選司官二員筆帖式四員

前往阿克蘇隨舒赫德辦事

癸卯

定邊將軍兆惠等疏奏波羅泥都逃竄喀什噶爾回衆迎降

兆惠等奏言臣等進兵喀什噶爾閏六月初三日  
至伊克斯哈喇據前隊叅贊大臣明瑞所派  
之游騎巴圖魯侍衛伍岱等夜聞行走聲息即  
行圍截見回人六騎稱係喀什噶爾投誠之人

因波羅泥都將伊等搶掠潛行逃遁伊等來迎  
大兵等語臣等逐一詢問稱係阿琿和濟默爾  
伯克和沙勒沙咱木沙扎巴爾呢雅斯俱喀什  
噶爾人又烏什回人額敏係霍集斯之族弟告  
稱去年被霍集占迫脅久欲歸誠今波羅泥都  
同霍集占逃去我等同喀什噶爾舊伯克奉書  
來迎臣等譯看呈詞云喀什噶爾大小人等謹  
呈阿克蘇等處駐劄將軍大人伯克霍集斯今

波羅泥都將喀什噶爾男婦驅逐出城至哈喇  
刻爾我等仰慕

大皇帝仁化復回城中看守波羅泥都同其親信人  
等至提斯袞暫住我等馬匹牲畜皆為所掠無  
力追奪且河水難渡懇大兵速來救援庶波羅  
泥都不致遠颺布魯特不來搶掠等語臣等詳  
加詰問據稱波羅泥都去年在葉爾羌被鎗矢  
傷因重甲未透曾遣人與霍集占計議投降霍

集占不允遂分途通使抵達克山霍罕額爾德  
尼等處拔達克山已有回音不知何語後阿卜  
都克勒木兩次與波羅泥都議事聞霍集占於  
四月內即將家口行裝俱移往葉爾羌迤西羌  
呼勒之赫色勒塔克若大兵復來則逃往拔達  
克山波羅泥都諸事俱與親信之烏沙克塔喇  
沁伯德爾格瑪呼斯之厄魯特密議不令我等  
知之惟索取糧馬所得之物六月初十以前陸

續運至塔勒巴楚克河僅與親信人等在城居住六月十五日據卡倫人報稱有布魯特百餘人在城西北之阿喇古槍掠波羅泥都令鄂斯瑞伯克優駕斯伯克等拒之於濟德朗塔拉大為所敗鄂斯瑞等俱得傷自此每日作為出兵之狀向我等湊集貲裝二十七日突將我等兵器奪去將男婦帶至提斯袞復奪其衣服而去臣等復詢和濟默爾等波羅泥都兄弟究竟逃



往何處爾等何不擒獻顯係誘我大兵輕裝前進據稱伊等遣使霍罕未有回音且慮布魯特搶掠必不敢前往惟霍集占於四月間即已遷移家口輜重而拔達克山使人已回又曾餽送拔達克山之克卜察克等部落禮物或係逃往其地我等實無力擒拏並無別情臣等詢問葉爾羌喀什噶爾從賊逃去者係何等人口現餘戶口若干其喀什噶爾村莊種植若何據稱不

知葉爾羌逃去人數其喀什噶爾之人波羅泥  
都帶去一百五十戶又親信之烏沙克等男丁  
千餘口家口亦多我等百餘戶內有帶去者此  
時亦多逃回計本城所屬共一萬六千餘戶人  
五萬餘口其汗額里吉衣雅普爾古烏什哈喇  
城之人俱各自保守牌租阿巴特有千餘戶亦  
不肯從賊彼此相拒此時不知勝負至所種地  
畝大麥已熟小麥尚未收割本城之阿奇木伯

克墨氏敏伯克阿卜都爾瑞俱被賊帶去城內  
街市俱焚城門亦燬有伯克托喀等現在修  
理等語臣等察看伊等投誠情形屬實但波羅  
泥都早已遠颺臣等議先攻喀什噶爾原欲斷  
其逃竄之地今約計趲送和闐馬匹閏六月初  
十間可到阿里衮巴祿之兵亦可抵巴爾楚克  
葉爾羌喀什噶爾既差人分途迎降想富德等  
自必聞知速往追襲現在來投人等雖無可疑

而受降如受敵自應倍加謹慎不必輕騎先進  
即領現在馬兵三千名前往安撫一面偵賊踪  
跡若果赴板達克山即直入其境宣示軍威曉  
以利害相機索取擒拏又和濟默爾等告稱沙  
喇斯瑪呼斯厄魯特已經離心恐竊取霍集占  
牲隻逃走亦行文策布登扎布令其隨路留心  
截殺奏入得

旨下部知之

定邊右副將軍富德疏奏脫出回人等信息及  
進兵日期

富德奏言六月十八日卡倫送到葉爾羌脫出  
額里齊回人郭爾拜默特等詢據供稱去年被阿  
卜都克勒木擄往葉爾羌聞知霍集占兄弟  
不協有伯克阿卜都瓜卜係伯克霍集斯之兄  
波羅泥都令其逃走等語十九日卡倫又送到  
從葉爾羌所屬薩納珠脫出賽里木回人海達

瑪特等據供去年霍集占在庫車敗逃將賽里木伯克阿布勒阿三擄去後聞大兵進勦復行戕殺我因逃至薩納珠聞大兵到和闐之信葉爾羌人等驚動霍集占將家口輜重移往哈子勒塔克又聞波羅泥都與伯克阿卜都瓜卜有恩帶往喀什噶爾後又令其逃往烏什必來尋霍集斯等語臣詢之霍集斯據告云我兄似難於逃出但波羅泥都果與霍集占不協伊與我

兄相得或通信歸誠亦未可定若我兄果來願以家口保其必無虛詐等語臣伏思葉爾羌脫出回人至營須行走二十日若喀什噶爾至烏什不過六七日程期應早至兆惠軍營臣自得兆惠派送臣營馬匹信後不知於何日進兵除將前項信息咨行外未便竚候回音臣於閏六月初旬即領現在馬兵一千二百餘名綠旗步兵一千二百餘名空趕馬匹徑行戈壁向固瑞

薩納珠前進沿途探聽兆惠進兵日期又候馬  
兵丁八百餘名俟叅贊大臣阿桂送馬到時與  
所帶牧馬兵丁七百餘名仍牽馬行走於攻城  
擒賊庶可得力奏入報

聞

叅贊大臣舒赫德等疏奏派撥臺站馬匹及牌  
租阿巴特回人信息

舒赫德等奏言臣等前奏和闐一路所設臺站



相去頗遠馬駝疲瘦亟宜添補又進兵葉爾羌  
更需增設今向內地取馬三百匹以購自回人  
及留牧阿克蘇馬匹叅雜派撥兆惠起程之際  
將阿克蘇至烏什臺站交臣等辦理自烏什以  
外派西安兵一百五十名察哈爾兵五十名吐  
魯番回人三十名令二等侍衛納林承辦喀喇  
沁臺站章京桑圖旺舒克巡查臣等隨撥馬一  
百二十匹駝一百隻交納林等帶往其烏什以

內於中途撥馬二十匹駝十隻綠旗兵十二名  
回人八名安設一臺與兆惠等臺站相接至阿  
克蘇距和闐一千二百餘里所設六臺不敷馳  
遞臣等酌於每站之中各添一臺每臺派綠旗  
兵六名回人四名駝十隻派員帶領前往分駐  
并折給糧價銀兩仍令三等侍衛伊凌阿管轄  
又臣等於閏六月初五日准貝勒玉素富報稱  
克勒品卡倫送來喀什噶爾所屬牌租阿巴特

回人額里訥則爾等據稱波羅泥都於六月二十七日將喀什噶爾大小人等欲移往拔達克山回衆不願同行逃來牌租阿巴特者甚多我等千餘戶回人俱願歸順今向將軍處具呈因馬乏暫住等語隨經換給馬匹派員送往軍營臣等查玉素富所報歸誠人等既經送往兆惠軍營自必酌量辦理但富德軍營亦應知會臣等已於本日具文由臺站馳遞奏入報

聞

定邊右副將軍富德等疏奏續查獎賞効力回人

富德等奏言臣等前奏兵抵和闐之日將効力回人等陸續查明酌量獎賞今查得現在隨營之伯克薩里於去年進勦葉爾羌奮勉効力從前擒達瓦齊時薩里先攀馬鐙達瓦齊引弓欲射薩里刀斷弓弦達瓦齊之子羅卜扎刀斫其

臆者三因著棉甲未透今來和闐凡傳喚開導  
回人事體俱明白勤慎是以遵

旨擬賞戴五品頂孔雀翎又管採金之三百戶承辦  
金器之伯克特穆爾於侍衛齊凌扎卜等招撫  
和闐時將霍集占金四十兩獻出前往兆惠軍  
營未達復同阿里木沙從克勒底雅領兵至額  
里齊固守三月現在查出賊人馬駝羊隻甚多  
臣等擬賞六品頂藍領又哈喇哈什回人阿賚

默特塔拉和卓因兄默默勒克沙在葉爾羌欲  
圖歸順為霍集占所覺伊兄與家口同被害伊  
身逃出阿卜都克勒木攻額里齊時伊兄阿比  
勒和卓又被賊殺伊復効力守城為瑚爾起嚮  
導殺賊一人奪駝四隻亦擬賞六品頂藍翎奏  
入報

聞

平定準噶爾方略正編卷七十四

欽定四庫全書

平定準噶爾方略正編卷七十五

乾隆二十四年閏六月甲辰

諭定邊將軍兆惠等相機追勦賊衆

上諭軍機大臣曰據兆惠等詢問來降回人知波羅泥都將喀什噶爾人衆驅出肆行搶掠霍集占於四月間遷移家口輜重於葉爾羌之西恐同謀逃往拔達克山富德亦詢知霍集占遷移家產領衆



於城外結營等語是喀什噶爾甚屬驚擾若從前  
霍集斯等早遣人招撫或可即獲渠魁今葉經逃  
遁兆惠仍宜撫定喀什噶爾俾無失所但聞喀什  
噶爾城踞山巔險要難克波羅泥都斷無棄此而  
逃往葉爾羌之理則霍集占此時亦必逃遁葉爾  
羌可不攻而下若霍集占果與伊兄同逃兆惠即  
留阿里衮駐於喀什噶爾而前往撫定葉爾羌富  
德額敏和卓明瑞作速領兵偵霍集占逃竄之路

窮追務獲其兵丁須選兩隊之健銳者每兵給馬  
三匹并多備口糧或天寒難進即暫於葉爾羌度  
歲次年辦理亦可總以擒獲逆賊兄弟始可告成  
功若僅取二城則事仍未竣至二城既克而渠魁  
未獲所有回人中阿奇木伯克等不必即令入覲  
致生疑懼又富德所奏波羅泥都遣霍集斯之兄  
阿卜都瓜卜來兆惠軍營等語兆惠未及奏及或  
係傳聞若果前來即善為撫慰相犒辦理再霍集

斯鄂對俱熟習回部情形追擒霍集占等時須酌  
令一人隨往且將來兩軍合隊毋論賊為誰獲皆  
同功一體務宜和衷集事不可稍分彼此俱著傳  
諭知之

臣等謹案葉爾羌城垣戶口甲於回部喀什  
噶爾地尤險要方我兵分道深入直搗賊巢  
尚疑霍集占兄弟敗衄之餘或且嬰城固拒  
以延殘喘縱掃穴易若摧枯未必能竟不煩

一矢乃先聲所至逆酋早膽落心惛倉皇駢  
走兵未血刃而二城已相率迎降蓋兩城之  
衆苦逆酋荼毒望解倒懸素仰

天朝德化亟思拯水火而登衽席時雨所至蛾伏逐  
師歌舞載途固其宜矣而我

皇上坐照幾先不特於波羅泥都驅衆肆掠時知將  
跳身遠遁即霍集占之必相附而逃葉爾羌  
之可不攻而下悉皆

預度不爽且為策其去路計拔達克山懾我兵威斷  
不敢收匿逋逃自貽伊戚羽書星發

密示軍營我將軍等虔奉

廟謨間道馳追每戰必捷二酋遊魂驚逝鉅險無依  
未幾而異域獻馘輸誠膚功克奏若操券馬  
在昔漢通西域唐開四鎮聊示羈縻旋得旋  
失且不過師武臣之間外定謀尚且艷稱史  
冊孰有若

宵旰運籌動符

勝算建非常之偉績廓未有之版圖盛於

今日者哉

命議敘領隊大臣愛隆阿等及陞賞得功官員

上諭軍機大臣曰兆惠奏稱愛隆阿福祿在軍營頗屬効力前議敘明瑞時遺漏未及等語愛隆阿福祿著交部照例補行議敘給與世職又據奏公鄂對與各回城官兵懇求隨征効力又烏什回人托

欽定四庫全書

卷七十五

克三伯克沙資雅東等似內地叅領職任達魯罕  
伯克阿卜都濟帕爾等似佐領職任請賞給頂帶  
回人摩羅和卓去年隨霍集斯在葉爾羌已獎賞  
藍翎等語公鄂對及各城回人等誠懇可嘉著加  
倍賞給整裝銀兩沙資雅東等六人著賞給四品  
頂帶阿卜都濟帕爾等六人著賞給五品頂帶此  
內摩羅和卓仍戴獎賞藍翎又

諭曰富德奏稱索倫領催英額勒圖甚屬奮勉効力

等語英額勒圖著加恩賜號額爾克巴圖魯賞銀  
一百兩又查奏招降克勒底雅塔克之索倫署驍  
騎校科卜堪領催車克德赫爾厄魯特薩爾魯克  
巴蘇泰等功次科卜堪等俱著准其實授薩爾魯  
克等俱授為藍翎侍衛又將伊隊內防禦一缺驍  
騎校四缺查明功次擬定正陪請補防禦員缺著  
擬正之驍騎校爪里補授驍騎校員缺著擬正之  
領催薩爾泰赫達扎齊蘭邁松阿補授



欽定四庫全書

卷七十五

命酌派烏什駐劄官兵及議敘阿克蘇効力官員

上諭軍機大臣曰據舒赫德奏稱烏什為大兵要路請派西安兵五百名交納世通帶往協同王素富辦事等語王素富係回部舊人駐劄烏什儘足辦理事務亦不必多駐兵丁酌增西安兵二百名足矣餘兵仍於阿克蘇駐劄或可不需即遵前旨撤回前因阿克蘇辦事有人曾諭永貴回京納世通仍在阿克蘇駐劄其隨同辦事之三等侍衛齊克

慎都司陳聖謨陳堯典協同王素富辦事之遊擊  
王萬邦既實心奮勉著以應陞之缺補用隨印之  
署筆帖式西安前鋒固林泰馬甲栢秀船廠馬甲  
雅庫俱甚屬効力固林泰雅庫著賞八品筆帖式  
職銜栢秀既係開戶著賞給縣丞虛銜

諭叅贊大臣阿桂速送軍營馬匹

上諭軍機大臣曰富德奏據葉爾羌脫出回人等告  
知霍集占潛逃信息領兵從固璫薩納珠前進與

兆惠約期會勦其無馬兵丁八百名留待阿桂所  
領送馬兵丁七百餘名作速趲赴等語適兆惠已  
得喀什噶爾乞降信息領兵迅往不久應與富德  
會合而富德隊內所候馬匹急需接濟可傳諭阿  
桂將所送馬匹籌畫速行不可遲滯

申諭喀爾喀副將軍策布登扎布堵勦逸賊

上諭軍機大臣曰據兆惠奏喀什噶爾來降回人信  
息知波羅泥都兄弟俱已逃遁沙喇斯瑪呼斯厄

魯特等或乘亂掠取回人牲隻逃走亦未可定等語前據定長奏烏魯木齊牧羣被賊盜竊尋踪追至察拉垓俱各散走朕即諭策布登扎布加意搜捕今回部賊曹既經逃遁則黨衆散走者必多可傳諭策布登扎布或於特穆爾圖淖爾等處或於伊犁附近擇水草之地派出官兵於賊人逃往哈薩克俄羅斯等要路安設卡倫堵截仍徧搜山林幽僻之地倘逆賊等即在其中豈非一好機會策

布登扎布其悉心籌酌辦理

命通飭軍臺官員稽察遲悞

上諭軍機大臣曰近見數次軍營奏報常有二三處所發一時齊到者設如兆惠之奏報經過阿克蘇而阿克蘇大臣等將所奏事件附之馳遞尚屬可行乃富德等由別路馳遞而亦與兆惠之奏齊至是必臺站人等積習接受事件不即飛遞留待後到者一同賁送之所致耳今當進勦之時軍機事

件刻不容緩豈可任意偷安以致遲悞著將此交與兵部按照軍臺通行曉示仍令管理臺站官員等不時稽查仍有似此玩延貽悞者務宜嚴叅治罪

乙巳

中諭定邊將軍兆惠等協擒霍集占

上諭軍機大臣曰昨得波羅泥都逃遁之奏朕即謂霍集占若尚在逗遛大兵可并力擒獲前諭兆惠

等領兵先取喀什噶爾者原以斷霍集占逃竄之路也今波羅泥都既遁喀什噶爾乞降料霍集占自不敢由此逃遁若兆惠抵喀什噶爾時霍集占尚據葉爾羌即令阿里衮額敏和卓撫定回衆伊達領本隊之兵急與富德并力攻葉爾羌擒獲霍集占波羅泥都即在逃亦可謂之竣事若霍集占聞伊兄既逃早已遁去兆惠仍遵前旨撫定葉爾羌回衆富德額敏和卓明瑞作速領兵追襲務期

擒獲俱著傳諭知之

諭參贊大臣巴祿酌往兩路軍營

上諭軍機大臣曰近據富德等奏巴祿兵少不便徑往葉爾羌朕即諭令據守要隘以斷兩城賊衆聲援仍聽兆惠調遣今波羅泥都在逃喀什噶爾乞降葉爾羌亦必有變動著傳諭巴祿不必據兩城要隘惟探聽兆惠富德兩軍信息就伊兵力可至何處隨何人行走有益即會同進發



諭陝甘總督楊應琚籌辦軍需事宜

上諭軍機大臣曰楊應琚奏庫車等處咨調緞布等項換易回人糧石已飭辦送等語看來布疋尤回人所需當此收穫之時用以換易糧石裕軍需而省餽餉莫便於此前已諭戶部酌撥庫貯布疋二萬解送肅州備用今復諭該部於出產省分酌量辦解總因甘省比年歉收當以民食為急其糧餉草束布疋既均無採買則本地價值自必平減為

有司者正當專力撫綏賑卹副朕嘉惠邊氓至意  
此時回中已有因糧之便軍務亦計日可竣該督  
等籌畫儲胥務使內地靜若無事斯為經理得宜  
耳可傳諭知之

丙午

以奏賀平定回城

訓諭辦理屯田副都統定長

上諭軍機大臣曰定長聞喀什噶爾回人歸誠具摺

奏賀甚屬非是此次將軍大臣進兵務將逆酋兄弟全行擒獲以奏膚功今波羅泥都逃遁所餘伯克數人獻城歸附大兵所至應以未獲渠魁為恨尚何喜之有且即波羅泥都悔罪歸誠亦不足道惟生得霍集占明正其罪方可竣事定長如此陳奏特平日視此甚難耳可謂不知事體著傳諭知之

丁未

諭定邊左副將軍成衮扎布等搜捕嗎哈沁事宜

上諭軍機大臣曰據成衮扎布議奏時當秋令若額爾克沙喇前赴策布登扎布處則馬力未免疲乏且薩拉布拉克卡倫被盜踪跡正在東南亦應速為搜捕額爾克沙喇業已起程請令其自烏魯木齊前往察拉琰等處沿途牧養馬匹詳悉搜捕既不遠行應將公策登薩木丕勒停其前往派台吉烏木布濟帶兵百名接濟等語即如所議行策登

薩木丕勒已經起程與烏木布濟俱著賞緞二端  
并傳諭努三若額爾克沙喇與伊程途相近即約  
會夾攻或甚遠則仍遵旨往博克達山搜捕盜竊  
烏魯木齊牧羣之賊俱著酌量辦理

秋七月己酉朔

定邊將軍兆惠等疏奏續聞波羅泥都霍集占  
逃竄信息

兆惠等奏言臣等聞喀什噶爾回人信息即領

兵前進一面知會富德又遣人由巴爾楚克知  
會阿里衮巴祿作速前來又因喀什噶爾麥熟  
未收派臣額敏和卓之子木薩等先行馳往安  
撫城堡查明逃賊地畝及應交糧石接濟軍食  
如布魯特兵來令其協同追賊閏六月初五日  
喀什噶爾所屬牌租阿巴特城伯克呢雅斯遣  
回人呈稱六月十二日霍集占遣阿卜都克勒  
木告知波羅泥都將葉爾羌喀什噶爾人等遷

移焚城掘樹波羅泥都與伯克等公議未決二十日阿卜都克勒木又來傳信將各城回人移往拔達克山約二十四日在提斯袞齊集我即於十二日閉城拒守聞提斯袞人等俱於二十九日至英噶薩爾閏六月初七日起程霍集占兄弟約於色勒古勒之齊里袞巴蘇相會若大兵速來即可擒獲等語臣等復將來呈與先降之阿琿和濟默爾等詳加詰問察其情形逆賊

逃竄屬實其未焚毀各城產業意尚觀望復回  
若但行尾追不邀截脫逃之路恐難弋獲臣等  
一面檄知布魯特納喇巴圖等截賊人前往色  
勒古勒投霍罕額爾德尼伯克之路一面儘力  
尾追於閏六月十三等日即抵喀什噶爾  
辦理安撫事宜聲言大兵即撤以緩賊急逃之  
勢再確探所逃何地速追務獲奏入報

聞



叅贊大臣阿里衮等疏奏多倫降回報賊逃信  
阿里衮等奏言臣與巴祿等於六月二十八日  
兵至陽阿里克距巴爾楚克頗近派副都統由  
屯侍衛查拉豐阿公特通額等領兵五百捉生  
詢問閏六月初六日抵巴爾楚克由屯等報稱  
革職効力之圖倫楚達禮善等拏獲多倫回人  
搜默特等三十餘口據供因聞大兵前來從喀  
什噶爾脫出今霍集占將巴爾楚克卡倫俱行

撤回伊兄弟在兩城聚集賊衆又聞布魯特等  
捨其村堡霍集占兄弟商議云若逃往喀喇圖  
伯特恐和闐大兵邀截遣人往投霍罕額爾德  
尼伯克又未允從欲從拔達克山路往痕都斯  
坦去等語臣等見搜默特等皆窮苦回人所言  
未足為實據已交解糧之員送往阿克蘇并行  
知兩路軍營奏入報

聞

叅贊大臣舒赫德等疏奏赫色勒降回報賊逃  
信

舒赫德等奏言閏六月十一日運送巴爾楚克  
糧餉回人於愛庫勒遇喀什噶爾脫出回人阿  
卜達喇木帶至阿克蘇據告稱本月初二日波  
羅泥都領喀什噶爾回人及瑪呼斯阿巴噶斯  
厄魯特伊犁種地回人共千餘戶欲逃往拔達  
克山從巴克塔克拉行走三日山路甚狹我係

離喀什噶爾百里赫色勒城之人因從英噶薩  
爾逃回本處我兄素丕爾格和卓係赫色勒頭  
目遣我來迎大兵等語又據告稱霍集斯之兄  
阿卜都瓜卜等家屬俱被波羅泥都帶去又詢  
同來回人邁瑪雅爾等據告稱我等係阿克蘇  
所屬克勒品回人去年霍集占掠往喀什噶爾  
之牌租阿巴特城我兄密雜呼爾班領屬人三  
百戶與伯克呢雅斯守城來迎大兵等語又詢

得喀什噶爾大伯克阿卜都喇伊木密里木哈  
子墨墨氏敏等皆與波羅泥都同逃中途棄其  
婦子逃歸伊等謀擒獻波羅泥都事洩後不知  
如何至波羅泥都之逃因霍集占先離葉爾羌  
是以同行現在二麥俱未收割城內馬匹雖盡  
去其村莊尚有存留等語并出回字呈文二紙  
臣等即將所得情形馳送兩路軍營奏入報

聞

諭定邊將軍兆惠等追勦賊衆事宜

上諭軍機大臣曰據兆惠阿里衮等奏報霍集占兄弟商議同逃看來從拔達克山往痕都斯坦較為確實我兵未抵城下賊已竄逸非將軍等之咎但二城即定而逆賊兄弟未擒難云竣事兆惠富德等自應窮追務獲且賊人伎倆已無所施若見我聲勢可畏必自相擒獻或稍存猶豫則亦必觀望苟延現在馬力有餘加以二城村堡所有俱可接

濟計奉到此旨不過八月初旬正可長驅深入或  
天氣漸寒即撤回葉爾羌來年再行追襲亦可至  
回人等雖應撫恤而馬匹必當拘收庶不假供等  
以足力俱著傳諭知之又

諭曰額敏和卓之子木薩奉委馳往喀什噶爾安撫  
回衆查勘地畝甚屬効力著加恩賞給公品級

庚戌

申諭定邊將軍兆惠等奮勉追勦逃賊

上諭軍機大臣曰昨據兆惠等奏稱霍集占兄弟俱  
經逃竄追襲最為緊要以我馬力有餘而逆賊等  
所攜萬槩雜以婦女童稚行走既不能便利多人  
亦易生變亂我兵當思威並用或招撫或離間中  
途必自潰散或有擒獻者至堵截雖亦一策但急  
追不能紆道或致徒疲馬力若果逃往拔達克山  
量伊地僅一小部落斷不能收養如許遁逃且豈  
肯自招罪累兆惠富德等惟宜悉心奮勉以奏膚



功守城拒賊之伯克呢雅斯兆惠等即量加獎賞  
其二城來降伯克等應如何酌予加恩俱著查明  
定議具奏

諭定邊左副將軍成衮扎布等防範逃賊事宜

上諭軍機大臣曰成衮扎布以籌畫策布登扎布行  
糧具奏今體察回部情形策布登扎布不須往特  
穆爾圖淖爾但於伊犁附近擇水草之地駐牧防  
範霍集占等逃入俄羅斯哈薩克之路併搜捕嗎

哈沁其官兵糧餉行文定長等支給

乙卯

諭定邊將軍兆惠等霍集占逃竄情形

上諭軍機大臣曰據玉素富奏稱從葉爾羌脫出之  
烏什回人阿奇木和卓等告知霍集占聞大兵將  
至向西逃竄波羅泥都通使安集延往復之間霍  
集占謂其難信留來人不遣以賊衆千人附阿卜  
都克勒木賽里克伯克守城等語霍集占聞風逃

竄自屬確實至以千人留葉爾羌則斷不能守此  
必逆賊等恐有追襲俾親信之人斷後揚言固守  
以作疑兵冀我師或不窮追久駐仍可復回抗拒  
耳兆惠所領兵馬尚無不足惟富德馬力稍弱頗  
為慮念但阿桂續進之兵亦可接濟其悉心奮勉  
行走至阿卜都克勒木從前固守庫車戕害托克  
托等實為逆黨渠魁此時果留葉爾羌務宜擒獲  
正法以抒衆憤俱著傳諭知之

丁巳

定邊將軍兆惠等疏奏撫定喀什噶爾

兆惠等奏言臣等領兵前往喀什噶爾在城大

小伯克并從前逆首霍集占自阿克蘇庫車多

倫克勒品等處移來回衆於百里外來迎臣等

經過村莊回人皆獻牛酒果餌情詞恭順又被

脅從賊乘間脫出之回人等俱稱霍集占搶掠

葉爾羌回衆馬匹牲畜及勒索回人摩羅等湊

銀四千兩於閏六月初二日起程由伯克和羅  
木渡口向羌呼勒逃去波羅泥都於六月二十  
七日搶掠喀什噶爾回衆由玉魯克嶺潛逃兄  
弟會齊同行同黨止四千餘人且訛言兵至自  
相掠奪等語臣等於閏六月十四日抵喀什噶  
爾回衆復獻牛羊果餌歌舞慶幸臣等加以撫  
慰詢問逆賊所逃之路據回人多羅特巴凱告  
稱波羅泥都兄弟相會之後同向色勒古勒逃

走雖均係拔達克山必由之路但道甚險遠伊等或往拔達克山附近之博洛爾或仍往安集延瑪爾噶朗霍罕納瑪噶等處今欲堵截擒拏則色勒古勒附近之帕密爾西通博洛爾拔達克山北通安集延等處地雖多石馬蹄釘鐵可  
以行走不過十數日程途等語臣等已知會阿  
里衮巴祿之兵約於本月十六七日可至臣明  
瑞愛隆阿溫布等即領兵二千名每人給馬二

匹於閏六月十五日起程晝夜追襲阿里衮等  
續到亦即前往其餘兵馬暫為休息臣兆惠一  
面將撫定喀什噶爾葉爾羌查核戶口田賦委  
員派兵防守各事宜辦理稍有端緒即領兵策  
應務期擒獲賊首上副

聖心其富德軍營信息已遣侍衛納克布及回人總  
管職銜色梯巴勒氏侍衛瑚圖禮等前往探聽  
協助奏入得

旨下部知之

定邊右副將軍富德等疏奏撫定葉爾羌

富德奏言臣等於閏六月初一日起程由固璦  
薩納珠前進派瑚爾起老格豐安烏三泰等哨  
探十一日夜據索倫總管薩壘等捉獲回人伊  
巴里葉木等四人告稱霍集占於初二日棄葉  
爾羌逃往英噶薩爾大小伯克等情願迎降賈  
有鈐記呈文二紙臣等伏思降人雖未可遽信



欽定四庫全書

平定回疆方略卷七十五

而我兵總宜進發隨派兵五百名令鄂博什等持檄往諭為首之喀瑪勒和卓等於十二日起程臣等隨即前進十三日阿桂達爾黨阿傅景送馬亦到沿途村莊回人俱扶老攜幼道左跪迎臣等宣布

皇恩令其各安生業行至聽雜阿卜河岸據鄂博什等報於十四日到城并將檄傳之喀瑪勒和卓等送來軍營據稱我等早欲歸順奈為霍集占

所脅今伊聞信潛逃始得如願自將軍檄到合  
城老幼無不踴躍鳴金擊鼓三晝夜共相慶賀  
等語十八日黎明我兵整飭旗纛按隊渡河自  
南門入城中觀者塞道爭獻果餌備述前受霍  
集占擾害從此永安生業臣等加以撫慰回衆  
同聲歡呼叩首復周行城垣十餘里皆以土築  
房屋較各城為密村莊亦多查詢從前戶口二  
萬三千有奇現存仍二萬戶復詢霍集占逃走

所向據稱欲往拔達克山又聞欲往安集延不知確實等語臣等務期窮追速獲獻俘

闕下一面探聽兆惠等收服喀什噶爾信息謹此馳奏奏入得

旨下部知之

命議叙撫定回城之將軍大臣官兵等

上諭軍機大臣曰據將軍兆惠富德等奏稱逆賊霍集占兄弟聞大兵前進率其親黨逃竄葉爾羌喀

什噶爾回衆俱輸忱歸順現在一面安撫兩城一面派出追勦等語覽奏深為欣慰逆賊兄弟雖畏罪先逃而兩大城實回部著名之地既歡迎恐後則二賊亦可計日就擒此皆將軍大臣官兵等奮勉所致甚屬可嘉俱著交部議敘

申諭定邊將軍兆惠等迅速追擒賊首事宜

上諭軍機大臣曰兆惠富德等具奏撫定回城業經加恩議敘仍著傳諭伊等激勵官兵益加奮勉務

使渠魁早獲以期承受寵榮從前曾降諭旨兆惠  
辦理兩城事務富德明瑞等領兵速往追賊即當  
作速起程沿途宣布朕諭以霍集占等罪由自取  
與脅從之衆無涉有能擒獻者必沛殊恩雖附和  
為惡如沙喇斯瑪呼斯人等倘能幡然悔悟去逆  
效順亦從寬免罪俱著遵照辦理

戊午

命議敘馳遞捷奏臺站官兵

上諭軍機大臣曰富德等奏撫定葉爾羌等城回衆  
紅旗馳報甚為迅速所有臺站人等自應加恩著  
將已里坤以內臺站交地方官查明其巴里坤以  
外交清馥定長舒赫德等查明造冊送部議敘  
諭定邊將軍兆惠等籌畫接應糧馬各事宜

上諭軍機大臣曰昨據兆惠奏派明瑞領兵二千追  
勦逆賊等語若明瑞等能速追即獲固屬甚善萬  
一賊衆遠颺則接濟官兵糧餉甚屬緊要但官兵

所至多布魯特等部落伊等業已歸誠又令協擒賊首自未便責其供應著兆惠豫為籌畫且亦當酌量馬力計節次辦送之馬將二萬匹自春迄夏始能全到伊等自應加意牧養有傷損者或向回人及布魯特等換易添補縱不可得但以足數萬人之馬派給勁旅五千自有餘裕若今歲不能竣事即暫回葉爾羌等處休息亦可至富德奏霍集占所居應否拆毀等語著即為辦事大臣公署擒

獲逆賊後或選授阿奇木伯克等亦可居住俱著傳諭知之

己未

諭叅贊大臣舒赫德等酌議回城官制

上諭軍機大臣曰舒赫德等奏稱阿克蘇係回部大城村莊甚多舊係伯克密喇卜等管理今雖不必準以內地官制而品級職掌宜為釐定庶足以辨等威而昭信守等語所奏甚是著照所請以阿奇



木伯克為三品伊沙噶伯克為四品噶雜納齊伯  
克為五品將應陞人員奏請補授其小伯克密喇  
卜等為六七品俟缺出揀選補授其餘各城俱一  
體辦理但回部諸城皆大兵進剿所定非哈密吐  
魯番之向化歸誠可比從前玉素富額敏和卓之  
屬人等本其世僕故所設官員俱不支俸此等回  
人雖承辦公事有官職大小之殊皆係朕之臣僕  
將來如阿奇木等大伯克或令其輪班入覲酌給

官俸其小伯克等或於所定租賦內通融支給亦可著傳諭舒赫德查核定議具奏俟回部全定後舉行此時不妨以籌辦大概曉示回人俾共知感激奮勉

癸亥

叅贊大臣舒赫德等疏奏查獲賊黨密爾圖遜正法

舒赫德奏言上年十二月有克勒品回人密爾

圖遜被霍集占移往喀什噶爾為賊嚮導捉生  
旋經發覺已將伊母正法今見霍集占逃竄又  
同克勒品回人等投回阿克蘇徵幸免死臣與  
本城伯克等查出嚴審服罪隨傳集伯克及回  
人等將密爾圖遜即行正法奏入報

聞

甲子

諭護軍統領努三等哈薩克貿易事宜

上諭軍機大臣曰據策布登扎布奏稱領兵至波羅  
呼濟爾遇哈薩克之哈喇巴喇克等言及貿易一  
事據稱上年哈巴木拜之子額得格等至烏魯木  
齊交易回抵游牧云馬一匹僅得緞一端衆人聞  
知俱不願前往今將軍等既准貿易須致書與阿  
布賚相商仍懸量為增給等語哈薩克乃微小部  
落貪利無厭若如所請增給貨物日後輾轉干求  
何所底止此則斷不可行況上年貿易馬匹原為

進勦逆回今諸城盡附逆賊計日可擒何必多購馬匹置之無用著傳諭努三等若哈薩克人等仍來貿易或嫖工料紕薄妄求增給即行曉示云緞疋皆商人貨物民間通用難以內庫賞賚之物相衡爾等如不願交易亦聽其便豈能曲從所請轉致累我商民現在伊等曾否前來及作何辦理即著奏聞

諭喀爾喀親王策布登扎布等撤回堵截官兵

上諭軍機大臣曰策布登扎布奏稱奉旨堵截逆回  
逃走要路詢之嚮導人等俱云特穆爾圖淖爾天  
氣甚寒七月後即有大雪請先探兆惠信息聽候  
調遣等語前諭策布登扎布等堵截逆賊蓋防其  
由哈薩克投入俄羅斯也今兆惠等既撫定葉爾  
羌等城霍集占兄弟向西逃走則特穆爾圖淖爾  
及伊犁等處俱無庸防範著即領兵由阿爾台回  
喀爾喀游牧併傳諭沿途駐劄大臣等知之

庚午

定邊將軍兆惠等疏奏辦理喀什噶爾等城事

宜

兆惠等奏言臣等撫定喀什噶爾等二城宣布  
皇恩凡棄賊來投者俱行免罪又查出各城遷來回  
衆二千五百餘戶一萬二千二百餘人俱送往  
阿克蘇以備屯田現在喀什噶爾大小十城七  
村莊回衆各安生業謹將各城及村莊繪圖呈

覽并將設官定職徵糧鑄錢及駐兵分防事宜列款  
具奏一喀什噶爾地居西北距肅州嘉峪關六  
千餘里其城周圍十餘里城內回人二千五百  
餘戶東界烏什阿克蘇有牌租阿巴特赫色勒  
布伊伊克阿喇圖什三城伯什克勒木阿爾巴  
特二大村共六千餘戶西界安集延布魯特內  
有巴哈阿喇圖什鄂坡勒塔什巴里克三城塞  
爾們托克庫爾薩克二大村共二千二百餘戶



南界葉爾羌內有英噶薩爾汗阿里克二城提  
斯袞哈喇刻爾二大村共四千四百餘戶北界  
布魯特內有阿喇古城霍爾干村共八百餘戶  
總計一萬六千餘戶數十萬餘口具載圖冊一  
各城村辦事應設官職查回部頭目曰阿奇木  
總理一城曰伊沙噶協辦阿奇木事曰商伯克  
管理租賦曰哈子管理刑名曰密喇卜管理水  
利曰訥克布管理匠役曰帕察沙布查拏賊盜

曰茂特色布承辦經教曰木特窪里管理田宅  
曰都管管理館驛曰巴濟格爾管理稅課曰阿  
爾巴布派差催課曰市琿協辦都管事曰巴克  
邁塔爾專管園林曰明伯克其職如千總今喀  
什噶爾阿奇木一缺請暫委吐魯番副台吉木  
薩署理其餘各職臣等查隨營効力之著姓回  
人及並未從逆之回人子孫等三十四人揀選  
補授謹列名具奏一每年貢賦數目查回人一

帕特瑪準官石四石五斗一噶爾布爾準五斗  
一察喇克準官秤十觔一騰格準制錢五十文  
值銀一兩初噶爾丹博碩克圖收降回衆定額  
每年納錢二萬六千騰格此內有種地之鄂爾  
托什人等納糧四萬八百九十八帕特瑪棉花  
一千四百六十三察喇克紅花三百六十五察  
喇克一帕特瑪折錢四騰格一察喇克棉花折  
錢四十八文紅花折錢三十二文共錢二萬一

千餘騰格又克色克緯克巴什人等納錢二萬  
六千騰格商賈牧養人等納錢二萬騰格俱以  
本色折納又供給羶屬喇嘛衣帽商人金銅稅  
園戶果稅邊界貿易回人徵稅十分之一外來  
貿易之人徵二十分之一俱未能如數全完波  
羅泥都居住後較前更少臣等推廣

皇仁請將羶屬及零星雜稅盡行蠲免歲徵糧四千  
帕特瑪棉花一千四百六十三察喇克紅花三

百六十五察喇克錢六千騰格俟將來駐兵與否酌交糧石銀兩金十兩葡萄一千觔解交

內府其貿易稅課照舊辦理一大兵進勦應籌糧餉除歸降回人照常納賦外其隨同逆回逃竄之人所種田禾均應入官充餉臣等查各城鄉現種麥秫綠豆共籽種一千七百九十九石五斗有奇豐年可獲七八倍荒年可二三倍但驚擾之餘應行酌減隨傳伯克等公議今歲各城

鄉共交糧二千帕特瑪準內地九千石其入官之地三倍交納共一千二百帕特瑪準內地五千四百石七月起至歲底交錢一萬三千餘騰格俱折收糧石舊果園七所歲徵葡萄俟藏貯成乾交納波羅泥都新果園十五所除給還強奪回人二所外其十三園所獲無多請充官兵賞賚之用一回部錢文應行改鑄查回城錢文俱紅銅鼓鑄計重二錢一面鑄準噶爾台吉之

名一面鑄回字因所產銅少每鑄新錢一萬騰  
格以新錢一文易舊錢二文銷毀更鑄又行換  
易今雖未便全收改鑄現有鑄礮銅七千餘觔  
請先鑄錢五十餘萬文換回舊錢另鑄一二年  
間可以盡改或照內地制錢每一文重一錢二  
分或即照回錢體質一面鑄乾隆通寶漢字一  
面鑄葉爾羌清文及回字謹呈樣請

旨一現在分路進兵追捕逆賊其喀什噶爾應酌量

駐防擬派西安滿兵三百名阿拉善兵五十餘  
名委散秩大臣伯永慶阿拉善公衮楚克管理  
仍留綠旗兵一千五百餘名委提督閔相師酌  
量城鄉邊界駐防臣一面前往葉爾羌查辦於  
閏六月二十五日起程其和闐阿克蘇等處情  
形頗有不同已行文舒赫德辦理奏入得

旨下部知之

諭定邊將軍兆惠等辦理回城及進勦事宜



上諭軍機大臣曰兆惠等撫定喀什噶爾城以辦理  
事宜具奏俱著照所請行其新授伯克等三十四  
人著賞給頂帶仍將軍營緞疋酌量賞給如有奮  
勉出衆者准戴獎賞翎所呈錢文已交錢局鑄造  
二百文發往為式即用該處工役鼓鑄至從前造  
賊等遷移之回人著發往伊犁屯田令其自備資  
斧不必官為辦理現在安插阿克蘇舒赫德宜留  
心約束原任喀什噶爾阿奇木伯克之霍什克伯

克等今若投為阿克蘇之伯克恐日久終生覬覦  
應送京安置為妥葉爾羌喀什噶爾二城乃回人  
根本補授阿奇木伯克甚為緊要朕意欲以額敏  
和卓管葉爾羌玉素富管喀什噶爾仍向伊等舊  
游牧往來行走如成衮扎布之游牧在塔米爾而  
駐劄烏里雅蘇台有此等舊人在彼始堪倚任此  
時且不必洩漏恐霍集斯失其希冀之心遂生懈  
怠俟大功告成再為辦理與額敏和卓等則不妨

密商另摺所奏之回人阿卜都喇伊木等因迎我  
大兵賊人將伊子弟之足折傷甚屬可憫應加恩  
賞卹又查出從前霍集占遣來偵探之回人既於  
軍營正法其烏什所送之阿奇木伯克托克默  
特曾害降回十七人亦如所奏送至哈密正法家  
口俱解京備賞又

諭曰兆惠等奏稱從霍集占處脫出之喀什噶爾回  
人云霍集占兄弟在塔該默暫住或往拔達克山

或往安集延俱未可定塔該默在塞勒古勒以內  
此時阿里衮巴祿之兵應尾追將及富德阿桂等  
相繼策應明瑞又已在前堵截可望擒獲即令逃  
入色勒古勒城則三路合圍或逃往外部落持檄  
往諭亦必擒獻等語覽奏殊為欣慰逆賊等既能  
分城拒守又不速行逃竄觀望逗遛必為我追及  
若慮其據險結營則我鎗礮之威斷難支持蓋伊  
等孽由自作惡貫滿盈故

天奪其魄俾早正刑誅耳至布魯特人等攻英噶薩爾  
村莊聞侍衛等檄止即撤兵入山恭順可嘉著傳  
旨慰諭仍酌賞緞疋

命優卹侍衛璫綽爾圖等并誅降賊之察哈爾丹巴  
林沁家屬

上諭大學士曰兆惠等奏據藍翎侍衛莫寧察家人  
瑪穆特脫出告稱前隨莫寧察及固濟爾巴圖魯  
侍衛璫綽爾圖與達什策凌等領兵百名前途偵

探遇賊千餘人猝被遮斷時莫寧察璫綽爾圖各  
據空屋固守有察哈爾丹巴林沁開門投賊我兵  
矢盡力竭莫寧察遇害璫綽爾圖與索倫六品官  
岱屯被執罵賊不屈逆首霍集占手斷其頸岱屯  
亦刳腹遇害等語達什策凌等前已加恩諭部優  
卹今璫綽爾圖被執罵賊始終不屈慘烈捐軀忠  
義之氣凜然覽奏深為嘉憫璫綽爾圖有無子嗣  
并前此作何加恩該部即查明具奏候朕加恩優

卹以勵忠貞岱屯著一併查奏瑪穆特被擒得脫  
情亦可矜著加恩作為另戶披甲至丹巴林沁開  
門投賊情甚可惡獲日應照叛逆律治罪著派乾  
清門侍衛舒常馳驛前往察哈爾會同該總管將  
丹巴林沁子孫查出鎖押插箭於八旗地方巡行  
示衆後即行正法其親兄弟妻女一併拏解來京  
賞給王大臣為奴

定邊將軍兆惠疏奏遷移回人各事宜

兆惠奏言前因布魯特居住之額爾克和卓額色尹之姪鄂托蘭珠和卓瑪穆特等投見詢其情詞與阿琿和濟默爾相同因令隨營寄書伊叔領兵協助臣等行近喀什噶爾額色尹等來告云六月十八日遇波羅泥都所屬百餘人奪燾一桿勦殺多人等語臣等加以撫慰令其遣人往取家屬俟入覲後遵

旨安插臣等竊思伊等係霍集占同族又與布魯特



相契恐回人等又以伊等為和卓妄行敬信應  
於到京後請

旨將伊等或留京城或安插安西哈密等處又多倫  
伯克阿爾祖等領回人千戶來投云被霍集占  
迫脅今願歸降等語臣等查多倫回人向在巴  
爾楚克以內居住上年霍集占從庫車敗逃時  
遣阿卜都哈里克傳喚伊等即時遷移與實被  
迫脅者不同因加以斥責復宣布

皇恩寬宥伊等甚屬畏懼聽候安插因將原任散秩  
大臣伯克托克托之弟阿卜都賚委為阿奇木  
令其照管暫移阿克蘇等處度歲俟來春酌於  
屯田處所安插行文舒赫德辦理伊等獻羊九  
百餘隻即給與官兵奏入報

聞

平定準噶爾方略正編卷七十五